



Presidente di Parlamento drs. Paul Croes:

Sr. Lio Booi un baluarte pa nos tur

DURANTE e celebracion den Kamerling Onnestraat, Presidente di Parlamento drs. Paul Croes tambe a uni su mes na e celebracion di cumpleaños di e baluarte di cultura, tradicion, arte y musica Sr. Lio Booi. Den un ambiente masha festivo y colorido, cu musica y bon ambiente e publico a gosa di tremendo celebracion. Presidente di Parlamento a combersa ampliamente cu Sr. Booi, y sigur a keda contento di por a comparti e momento di alegria aki cu e famia tambe di Sr. Booi.

Den un entrevista cu e Presidente di Parlamento e la muestra riba e importancia di Sr. Lio Booi pa nos cultura, musica, canto, pintura y poesia pa nos na Aruba. Tambe cu Sr. Booi ya for di hopi aña pasa, formando parti di e comision cu a composita e di tres couplet di nos himno, a menciona cu e grandesa di nos pueblo ta su gran cordialidad, y te awe esaki ta asina den nos sector di turismo. Hendenan ta keda bin Aruba, pasobra nos hendenan ta hendenan cordial. Un persona cu semper su moto tabata, Pon e Arubiano na altura di su cultura y siñe conoce di otro. drs. Croes a expresa cu Sr. Lio Booi un persona di Boneiro cu a sa di stima nos isla igualmente y a biba cu e pensamiento “cu Dios por guia y conserva nos amor pa libertad”. Cancionnan cu semper ta keda cerca di nos curason ta “Yanto di un mama”, “Chanita”, “fiesta trai ponton”, ta haci señor Lio Booi un simbolo di nos cultura, escritura y musica. Drs. Paul Croes yiu di Sr. Addison Croes (q.e.p.d), un persona cu semper a inculca e cultura y musica di Aruba den su yiunan pero tambe den tur hende, ta compronde hopi bon kico Sr. Booi ta significa pa nos canto te dia di awe. “Un pabien grandi na Sr. Booi y henter su famia cu e celebracion di e bunita edad di 93 aña. Cu Dios duna Sr. Booi hopi mas aña di salud y bendicion” drs. Paul Croes a finalisa bisando.